

碧霞元君護國庇民普濟保生妙經

隸五

碧霞元君護國庇民普濟保生妙經 隸五

開經偈

大慈天仙聖 劫初證上真

化身為救苦 發願度天人

灾祥察善惡 休苦應元因

隸五

嶽兵悉皆統 濟顯度幽沉

有念無不應 誠思即感通

志心祈福佑 皈命禮真經

元始天尊說碧霞元君護國庇民普濟保生

妙經



爾時

元始天尊駕幸始青上境碧玉瓊臺陞自然  
百寶法座為諸侍真說一元妙化至玄上道  
是時

天尊光暎萬天仙樂自鳴天花徧滿異香飛

揚諸天諸帝三界群真雲集臺下作禮既畢  
環拱座前咸聽說法時有五嶽獻花四瀆貢  
寶班集中有一真人名曰鬱羅出班端跪上

白

天尊曰臣昔宿何緣得侍玉陛幸聞至道深

荷

恩慈造化所司愚懷未悟切以下界生民生  
生化化各有神司判注天人悉由東嶽碧霞  
元君亦主泰山證位緣何願聞道因  
天尊曰善哉斯問汝復其位吾為宣說天地

既判五嶽莫方萬物生春萬化始東東嶽注  
生燮理元工上古生人稟性貞良克全忠孝  
生而多壽死而往生元無愆釁無復幽冥不  
失本真往生善道末世人民行違古道心生  
巧術不忠君王不孝父母不敬師長不友兄

弟恃強凌弱妄行爭奪殺盜姦淫褻瀆三光  
不懼神明及有婦女罔知宿世因緣今受如  
是身命不自悔悟妄起貪嗔欲富憎貧怨天  
恨地侮慢公姑欺辱妯娌忍為不仁作踐兒  
女淫祀邪神暗行咒詛為惡種種報對無停

隸五

二

是時元君已證太一青玄之位觀見衆生受  
此沉淪悲慈不已為化女流普度群生於四  
月十八日分真化炁現是慈顏陟降泰山靜  
居上境復鍊元真功周億劫慈光洞照徧徹  
幽微應九炁以生生體一元而化化神功莫

測浩德難量惠溥天民傾土皈仰受命  
玉帝證位天仙統攝嶽府神兵照察人間善  
惡罪福照報感應速彰真人稽首問曰奸人  
巧詐口是心非何由照察

大尊告曰人之元神稟受於天善惡初萌神

明耶照雖處幽隱心跡自露舉一善念昭顯  
若光之影人不能見神已鑒之即有掌善之  
神記於善籍舉一惡念響應如谷裏之聲人  
不能聞神已聞之即有掌惡之神記於惡籍  
善惡之作雖殊感召之速則一真人再拜問

曰。報應驗。亦未得聞。

天尊告曰。神聖功用。無有聲色。但假人事。默寓神機。凡人動作之際。遭逢善事。是為善報。遭逢惡事。是為惡報。或遭車馬舟航之沉落。或遭猛火洪水之焚溺。或遭刀兵劫賊之橫

隸五

三

誅。或遭虎狼蟲蛇之毒噉。或遭官司牢獄之刑。囚或遭鬼崇邪精之纏害。或遭瘟瘧癘瘡。之弗痊。或遭凶曜惡星之臨照。或遭蠱毒藥毒之傷殘。或遭非命橫亡之促暴。一切苦厄。雖係遭逢。皆由惡因。致罹斯苦。亦有為善之

人而遭不善之事。必遇善人解釋。是為神護。莫言五逆十惡之人。見履安福。各有本屬司命土地。會合社令城隍里域神司。告聞所隸獄主。錄奏玉帝。勅令火部雷司。勘驗真明。候時誅罰。帝嘗有命。行下斬伐判逆大神。巡行人世。如有謀弑父母尊長者。事雖未形。心已萌惡。即行顯戮。魂下酆都。加諸苦罪。不得赦原。善男信女。命終之後。不見地獄。徑生天堂。若生人間。則居中國。為男子身。聰明富貴。而獲壽年。真人問曰。善惡往因。昭報於世。何以



見之。

才

天尊曰。欲知往生。當觀今生。欲知來世。當觀  
今世。今若生於王宮國戚。侯門巨室。及於清  
閒福地。身心不勞。安樂康榮。此是三世良因。  
今世雖或生於人中。眼目盲壞。瘡毒纏身。不  
得安愈。乞丐道途。不刑自痛。泣地號天。此是  
往生不敬天地三光。不信三寶。誹謗經文。今  
受斯報。或腐唇闕鼻。手攣足跛。人所憎棄。此  
是往生呵風罵雨。毀罵父母公姑。倚仗血氣。  
凌爍平人。今受斯報。或遭產難。不順分娩。或

子存母喪。或母子俱亡。此是往生。揉墮胎嬰。拋棄兒女。殘悞托生。今受斯報。或痴聾啞。難聽難言。此是往生。巧運心機。哄瞞痴愚。今受斯報。或衣不護寒。食不濟餒。死於溝壑。暴露尸骸。此是往生。不惜五穀。作踐綾羅。今受斯報。或為女流。生於卑賤之中。友遭寇夷。虜掠者。此是往生。倚恃克強。姦欺良善。今受斯報。種種果報。說不可盡。俱係前因。判注無錯。若不悟悔前非。斷惡修善。復生於鱗介毛羽。爪牙蹄角之類。其中多受鞭撻。屠割烹煎。復

化微蟲難復人身。真人聞是惡報。稽顙拜曰。下民無知。一如亦子。以何熏修。得免斯報。伏望

天慈恩廣好生。開明善道。

天尊告曰。碧霞元君。雖曰罰惡。意在度人。但能自新。無不救度。所有神咒。能解宿愆。吾為宣說。

大道之始 無象無言 天地既闢

萬神司權 泰山岱嶽 奠靖坤元

中有元君 號曰天仙 始證帝真

位居碧天 為化衆生 示現慈顏

大顯神通 威德孔宣 安民護國

警世敦元 輔忠助孝 翼正扶賢

保生益算 延嗣綿綿 消灾化難

度厄除愆 驅瘟攝毒 剪崇和冤

隸五

五

嶽庭官將 彌令威嚴 不仁不義

忤逆克頑 不尊正道 化微塵烟

敢有咒詛 押送酆山 魂繫幽司

萬劫不原 下民有禱 無願不全

大慈應感 溥濟人天

天尊謂鬱羅真人曰。若人一念回心。皈依正道。心神內靜。結習外消。便請清戒道士。成就觀字。或于家庭。嚴潔齋壇。盡心建善。諷誦是經。或三五七遍。或至百遍千遍。皈命元君。焚香懺悔。注想慈容。儼然如在。五體投地。百拜祈恩。即得罪銷黑書。愆除嶽府。身家寧吉。禍患消弭。出入亨通。動居利泰。九玄七祖。咸得逍遙。真人聞是利益。踴躍懽忻。臣今得遇是經。願為流布人間。俾令兆民咸歸仁化。齊興慈讓。保國清平。真人再拜。而說讚曰。

皈命碧霞經

宿業解三生

轉誦碧霞經

災難不臨身

仰體碧霞經

默有鬼神欽

恪禮碧霞經

家眷保安寧

存想碧霞經

精氣神光融

敬慕碧霞經

福祿壽齊增

佩帶碧霞經

邪惡不敢侵

諷演碧霞經

田宅益興隆

供養碧霞經

火盜永不生

讚詠碧霞經

萬願悉如心

天尊曰。仁哉鬱羅。能為天人。遂其利樂。功德無量。宜進仙勳。

天尊說經法已。駕返清都。諸天仙衆。頂禮奉送。慶會難言。是時真人下傳世間。以廣宣化。元始天尊說碧霞元君護國庇民普濟保生

隸五

六

妙經終

天仙碧霞寶誥

泰山上頂東嶽內宮。曩時現玉女之身。根本即帝真之質。膺九炁而垂慈示相。冠百靈而智慧圓融。行滿十方。功周億劫。依證天仙之

號冊顯碧霞之封。統嶽府之神兵。掌人間之  
善惡。尋聲赴感。護國安民。大聖大慈。至孝至  
仁。天仙玉女。廣靈慈惠。恭順溥濟。保生真人。  
護國庇民宏德碧霞元君。





